



Republika e Kosovës – Republika Kosova
Paneli Zgjedhor për Ankesa dhe Parashtresa
Izborni Panel za Žalbe i Predstavke

Anr.346/2019

Paneli Zgjedhor për Ankesa dhe Parashtresa (PZAP), në panelin e përbërë nga gjyqtarët: Gyltene Sylejmani kryesuese, Faton Adem dhe Adnan Konushevcu anëtarë, me pjesëmarrjen e zyrtares ligjore Vlerona Maliqi, duke vendosur përkitazi me ankesën e Snežana Jovanović, nga radhët e subjektit politik Lista Serbe, me seli në Graçanicë, paraqitur kundër Këshillit të Vendvotimit 3415E/01D, në Kishnicë, Komuna Graçanicë, respektivisht Avni dhe Bajram Gashi-t, për shkak të shkeljes së Kodit të Mirësjelljes dhe Rregullave Zgjedhore, për Zgjedhjet e Parakohshme për Kuvendin e Republikës së Kosovës, të datës 06.10.2019, në seancën e panelit të mbajtur më datë 10.10.2019, mori këtë:

V E N D I M

REFUZOHET e pabazuar ankesa Anr.346/2019 e datës 07.10.2019, e paraqitur nga Snežana Jovanović, nga radhët e subjektit politik Lista Serbe, me seli në Graçanicë, kundër menaxherit të Qendrës së Votimit 3415E/01D, Bajram Gashi dhe kryesuesit të të njëjtit Avni Gashi, për shkak të shkeljes së Kodit të Mirësjelljes dhe Rregullave Zgjedhore, për Zgjedhjet e Parakohshme për Kuvendin e Republikës së Kosovës, të datës 06.10.2019.

A r s y e t i m

Me datë 07.10.2019, Snežana Jovanović, nga radhët e subjektit politik Lista Serbe, me seli në Graçanicë, ka parashtruar ankesë në PZAP, në të cilën pretendon se më datë 06.10.2019, në vendvotimin me nr.3415D, në Shtëpinë e Kulturës në Kishnicë, ka ardhur deri te një parregullsi gjatë votimit, ashtu që gjatë procesit zgjedhor, përveç flamurit të Republikës së Kosovës, si simbol i një shteti, ka qenë i vendosur edhe flamuri i shtetit të huaj, respektivisht ai i Republikës së Shqipërisë, gjë kjo e cila sipas paraqitëses së ankesës ka shkaktuar nxitjen e urrejtjes etnike ndërmjet votuesve. Më tej ka shtuar se lidhur me këtë parregullsi nuk kanë reaguar as kryesuesi i KVV-së dhe as menaxheri i Qendrës së Votimit, të cilët në bazë të Kodit të Mirësjelljes dhe Rregullës Zgjedhore Nr.11/2013, kanë qenë të obliguar të reagojnë. Sipas paraqitëses së ankesës,

vendosja e simboleve të shtetit të huaj në vendvotime, ka shkaktuar një nxitje më të madhe të publikut, kur ka dalë lajmi edhe në media: Andaj ka kërkuar nga PZAP-i, që ta miratoj ankesën dhe në bazë të përgjegjësisë objektive të i dënoj subjektet, kryesuesin Avni Gashi dhe menaxherin Bajram Gashi, për shkak të mos largimit dhe mos reagimit ndaj situatës kontestuese.

Paraqitësja e ankesës, si dëshmi për të argumentuar pretendimet e saj, ankesës i ka bashkangjitur disa fotografi të printuara, dhe një kopje të lajmit të publikuar për situatën kontestuese, në cilësi të provave materiale.

Në përgjigje në ankesë të datës 08.10.2019, Avni Gashi, nga fshati Kishnicë, Komuna Graçanicë, lidhur me pretendimet ankimore, nuk e mohon faktin se ditën e zgjedhjeve ka qenë prezent në vendvotimin 3415E/01D, në Shtëpinë e Kulturës në Kishnicë, por i mohon pretendimet ankimore lidhur me nxitjen e urrejtjes etnike ndërmjet votuesve, me arsyetimin se objekti në të cilin është kryer procesi zgjedhor, është vend ku i kryen aktivitetet Shoqëria Kulturore Artistike “Minatori i Ri”, Kishnicë, dhe ato simbole janë të vendosura aty shumë kohë më parë, periudhë kohore kjo për të cilën as ai vet nuk është në dijeni, dhe as ai që i ka vendosur më herët, koreografi Skender Thaqi, ka qenë trajnues i këtyre zgjedhjeve, dhe trajnimet janë mbajtur në po këtë objekt. Më tej ka shtuar se ndihet shumë keq për atë që ka ndodhur, duke theksuar se gjatë gjithë procesit kanë pasur anëtarë – komisionerë të dy nacionaliteteve, shqiptar dhe serb, me të cilët kanë kaluar shumë mirë, dhe se ai personalisht nuk ndjen urrejtje për askënd. Në fund ka shtuar se kërkon falje nga PZAP-i, Lista Serbe dhe çdo person tjetër që është prekur nga ky rast, për këtë lëshim që është bërë, duke theksuar se nuk është bërë me vetëdije, se ai ka hallet e tij, pasi që ka një djalë të palëvizshëm dhe nuk ka pasur për qëllim të dëmtoj askënd. Për këtë lëshim i njëjti ka deklaruar se është i gatshëm të kërkoj falje në mënyrë publike.

Në përgjigje në ankesë të datës 08.10.2019, Igor Ćirković, Zyrtar i Lartë Komunal Zgjedhor, ka theksuar se për shkeljen e pretenduar në ankesë, është njoftuar nga paraqitësja e ankesës, përmes telefonit, në ditën e votimit, më datë 06.10.2019 në ora 18:45, të cilën ai e ka njoftuar që nëse mendon se ka pasur ndonjë shkelje t’i drejtohet PZAP-it, përmes ankesës. Më tej ka shtuar se, lidhur me shkeljen e pretenduar, përgjegjësinë për planifikimin dhe organizimin e të gjitha aktiviteteve teknike, brenda dhe jashtë Qendrës së Votimit, në diametrin prej 25 metërsh nga hyrja në objekt e mban menaxheri i Qendrës së Votimit, ashtu siç përcaktohet me Rregullën Zgjedhore Nr.09/2013 të KQZ-së, respektivisht nenin 6 par.2, dhe nenin 8 par.8, të kësaj Rregulle i cili përcakton se lidhur me përgatitjet teknike në vendvotime, përgjegjësinë për përgatitjen dhe rregullimin e vendvotimit e mbajnë të gjithë anëtarët e Këshillit të Vendvotimit, dhe me Udhëzuesin për procedurat e votimit dhe numërimit, të lëshuar nga Sekretariati i KQZ-së,

Në përgjigje në ankesë të datës 08.10.2019, Komisioni Qendror i Zgjedhjeve (KQZ), ka theksuar se pretendimet e palës ankuese janë të paqëndrueshme, sepse neni 33 pika

1 e LZP-së dhe Rregulla Zgjedhore Nr.11/2013, i specifikon veprimet e ndaluara të subjekteve politike, gjatë periudhës së fushatës zgjedhore, dhe jo veprimet e ndaluara për ditën e zgjedhjeve në vendvotim, andaj në bazë të dispozitave ligjore të lartcekura, ankesa është e pabazuar dhe si e tillë duhet të refuzohet.

Në përgjigje në ankesë, të dhënë përmes email-it, më datë 09.10.2019, Antigona Thaqi, ka theksuar se ajo ka qenë komisionere në Kishnicë, dhe i ka kryer detyrat e saj, ndërsa përgjegjës i sallës ka qenë dikush tjetër, duke shtuar se vendvotimi ka qenë Shtëpi e Kulturës dhe si çdo objekt tjetër i cili karakterizohet me diçka, edhe ajo i ka pas karakteristikat e veta, kështu që nuk ka pas asnjë arsye për me shfaq urrejtje etnike me serb, sepse në Graçanicë dhe Kishnicë kanë raporte shumë të mira me ta.

Në deklaratën e Vladimir Stojanović, të dhënë në PZAP, më datë 09.10.2019, i njëjti ka theksuar se më datë 06.10.2019, ai ka qenë anëtar i këshillit të vendvotimit, në vendvotimin 3415E/01D në Kishnicë, në të cilin vendvotim ka qenë i vendosur flamuri i Kosovës dhe afër tij edhe flamuri i Republikës së Shqipërisë, dhe se ai si anëtar i KVV-së, nuk e ka ditur se nuk do të duhej që aty të jetë i vendosur flamuri i një shteti tjetër, por ka menduar se kjo ka qenë detyrë e kryesuesit të KVV-së dhe menaxherit të Qendrës së Votimit.

Në përgjigje në ankesë, të datës 09.10.2019, Bajram Gashi, ka theksuar se në zgjedhjet e datës 06.10.2019, i njëjti ka qenë në pozitën e menaxherit në Qendrën e Votimit, në Shtëpinë e Kulturës në Kishnicë, Komuna Graçanicë, duke mohuar prezencën e paraqitëses së ankesës në atë vendvotim si komisionere. Sa i përket pretendimeve ankimore lidhur me çështjen e flamujve, i njëjti ka theksuar se këto pretendime janë të pavërteta, pasi që në atë vendvotim nuk ka pasur flamuj, duke shtuar se aty është Shtëpia e Kulturës e ansamblit vokalo – instrumental “Minatori i Ri”, Kishnicë, ku ka disa fotografi të ngjitura në mur, në mesin e të cilave janë edhe fotografitë e flamujve në fjalë, pra janë fotografi me flamuj dhe jo flamuj të varur, fotografi këto të cilat ka rreth 5-6 vite që janë vendosur aty, dhe nuk ka pasur asnjëherë ankesa lidhur me vendosjen e tyre në atë vend, edhe pse edhe më herët në atë vend janë mbajtur zgjedhje, poashtu aty janë mbajtur edhe trajnimet për vëzhgues e komisionerë, dhe askush nuk ka kërkuar që ato foto të largohen nga aty. Në fund edhe një herë ka mohuar se paraqitësja e ankesës ka qenë në detyrë në atë vendvotim, por sipas të njëjtit nga informatat të cilat ai i ka marrë nga një komisioner nga Lista Serbe, me emrin Zoran, ka rezultuar se derisa një votuese ka votuar, të afërmit e saj e kanë fotografuar dhe tel aparatit i ka zënë edhe fotot e ansamblit dhe kjo votuese e ka paraqitur ankesën. Sipas të njëjtit, atë ditë, edhe pse kanë qenë të pranishëm vëzhgues ndërkombëtar nga OSCE, monitorues të zgjedhjeve nga KQZ, askush nuk kanë dhënë vërejtje për ndonjë parregullsi, duke kërkuar nga organet kompetente që të shkojnë në vendshikim në këtë vendvotim, dhe të verifikojnë fotografitë që janë aty.

Në përgjigje në ankesë, të datës 09.10.2019, Skender Bardhecaj, ka theksuar se fotoja me flamuj e vendosur në Shtëpinë e Kulturës në Kishnicë, aty nuk është vendosur atë ditë, por ka qenë edhe më herët.

Në konstatimet zyrtare të datës 09.10.2019, të nxjerra nga zyrtarët e PZAP-it, theksohet se përkundër përpjekjeve të tyre për të marrë në kontakt anëtarët e Këshillit të vendotimit 3415e/01D Momir Živić dhe Xheneta Koliq-in, nëpërmes telefonit, nuk kanë arritur të bien në kontakt me personat në fjalë, pasi që nuk kishte qasje në telefonat e tyre.

Në përgjigje në ankesë të datës 10.10.2019, subjekti politik Partia Demokratike e Kosovës, ka theksuar në bazë të nenit 33 pika 1 e LZP-së, nuk mban përgjegjësi, por në një rast të tillë në përgjegjësi duhet të merret organizatori i zgjedhjeve, duke shtuar se meqenëse vend i vendotimeve janë shkollat publike, duhet të merret parasysh fakti se në secilin objekt shkollor kemi vendosje të flamujve, dhe si e tillë nuk mund të përmbajë nxitje apo provokim ndaj ndonjë mase të caktuar.

PZAP-i, pasi që shqyrtoj pretendimet e palëve në procedurë dhe analizoi shkresat e lëndës gjeti se:

Ankesa është e pa bazuar, për këto arsye:

Ankuesja në ankesë pretendon se nga ana e menaxherit të Qendrës së Votimit me numër 3415E/01D Bajram Gashi, dhe kryesuesit të të njëjtit, Avni Gashi, me rastin e Zgjedhjeve të Parakohshme për Kuvendin e Republikës së Kosovës, është bërë shkelje e Ligjit për Zgjedhjet e Përgjithshme (LZP) dhe Rregullës Zgjedhore Nr.11/2013 – Kodi i Mirësjelljes për Subjektet Politike, Mbështetësit e tyre dhe Kandidatët, për faktin se në ditën e zgjedhjeve të 6 Tetorit 2019, në vendvotimin me numër 3415E/01D, në Kishnicë, Komuna Graçanicë, brenda vendvotimit, në mur është vendosur një pano, në të cilën ndër të tjera gjenden edhe dy flamuj, respektivisht flamuri i Republikës së Kosovës dhe ai i Republikës së Shqipërisë, e që sipas paraqitëse së ankesës, prania e një materiali të tillë, në një vendvotim, në ditën e zgjedhjeve, ka shkaktuar nxitjen e urrejtjes etnike ndërmjet votuesve.

Paneli, pas vlerësimit të pretendimeve ankimore të paraqitëses së ankesës, përgjigjeve në ankesë dhe shkresave tjera të lëndës, vlerësoj se pretendimet në ankesë nuk qëndrojnë, për faktin se me dispozitën ligjore të LZP-së, në të cilat i referohet ankuesja në ankesë respektivisht nenin 33 par.1, pika l), dhe nenin 4 par.1, pika k) të Rregullës Zgjedhore Nr. 11/2013, përcaktohen veprimet e ndaluara të subjekteve politike, ndër të tjera ndalohen edhe veprimet të cilat mund të nxisin urrejtje kundër të tjerëve, por këto dispozita vlejnjë vetëm për periudhën gjatë fushatës zgjedhore dhe jo edhe për veprimet në ditën e zgjedhjeve.

Andaj, meqenëse, dispozitat e lartëcekura ligjore, specifikojnë veprimet e ndaluara të subjekteve politike, gjatë periudhës së fushatës zgjedhore, dhe jo veprimet e ndaluara për ditën e zgjedhjeve në një vendvotim, Paneli vlerësoj se nuk ka bazë ligjore që në mbështetje të dispozitave sipërcituara të LZP-së dhe Rregullave zgjedhore të sanksionohet, menaxheri, kryesuesi apo anëtarët e Këshillit të vendvotimit me numër 3415E/01D, në Kishnicë, Komuna Graçanicë, ashtu si pa bazë theksohet në ankesë.

Nga sa u tha më sipër e duke u bazuar në nenin 4 par.1, pika k), të Rregullës Zgjedhore Nr.11/2013, nenin 33 par.1, pika l), nenin 115 par.1 dhe nenin 118 par.1, të LZP-së, Paneli vendosi si në dispozitiv të këtij vendimi.

Paneli Zgjedhor për Ankesa dhe Parashtrësia
Anr.346 /2019 më datë 10.10.2019

Kryesuese e Panelit
Gyltene Sylejmani



Këshillë juridike: Kundër këtij vendimi nuk lejohet ankesa konform nenit 118.4 të LZP-së.